

**Nunaoil A/S pillugu Inatsisartut inatsisissaattut siunnersuut**

Inuussutissarsiornermut Aatsitassanullu Naalakkersuisoq

**Akissuteqaat**

(Inuussutissarsiornermut Aatsitassanullu Naalakkersuisoq)

**Aappassaanneerneqarnera**

Inuussutissarsiornermut Ataatsimiititaliamut qujanaq, siunnersuut akuersaartumik isumaqatigiiffiusumillu tigulluarmassuk. Tamatuma kingunerisaanik aatsitassanut suliaasaqarfiup tiguneqarnissaanut immikkoortoq pingaarutilik sulii ataaseq inissittussanngorpoq.

Inuussutissarsiornermut Ataatsimiititaliap isumaliutissiisummini oqaatigaa, Nunaoil A/S-imi siulersuisuni ilaasortat suliatigut piginnaaneqarnissaat piumasaqaatigineqassasoq, soorlu aamma taamatut Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni, aningaasaateqarfiup aqutsisuisa katitigaanerannut tunngatillugu aammalu aningaasaateqarfiup siulersuisuni ilaasortat piginnaaneqarnissaannut piumasaqaatinik aalajangersaasoqartoq.

Taamaattumik Inuussutissarsiornermut Ataatsimiititaliap allannguutissatut siunnersuut ingerlatseqatigiiffiup aqutsisuinut tunngassuteqartoq saqqummiuppa.

Maluginiarneqassaaq Nunaoil A/S-ip aktiaatileqatigiiffiunera allaanerussutaammat, taamaattumik aamma allatigut ingerlatseqatigiiffinnut inatsisit malillugit inatsisitigut maleruagassaqartinneqarluni, akerlianilli Kalaallit Nunaata Aatsitassarsiornermi Aningaasaateqarfia taamaallaat immikkut inatsimmi aningaasaateqarfimmut tassungaannaq atuuttumi inatsisitigut maleruagassaqartinneqarpoq.

Allatigut ataatsimiititaliap isumaliutersuutai Naalakkersuisut isumaqatigisorujussuaat, pingaartumik Nunaoil A/S-ip piffissap ingerlanerani ikummatissiassanut tunngatillugu Kalaallit Nunaata inerisaaviulluarsinnaanerani atorluanaanermi pingaaruteqartut inissisimalersinnaanerata kissaatiginarneranut tunngatillugu.

Taamaattumik soorunami siulersuisuni ilaasortat ataatsimoorlutik inatsisitigut aningaasaqarnikkullu pissutsinut tunngatillugu ilisimasariaqakkanik qaffasissumik ilisimasaqarnermikkut takutitsisinaanissaat kiisalu ikummatissiassanik misissuineranut qalluinernullu tunngatillugu naleqquttumik inuussutissarsiornikkut misilittagaqartuunissaat Naalakkersuisut eqqumaffigisorujussuussavaat.

Taamaattorli Inuussutissarsiornermut Ataatsimiititaliap allannguutissatut siunnersuutaani immikkoortut ataasiakkaat Naalakkersuisut tamakkiisumik malissinnaanngilaat.

Tassani pineqarpoq siulersuisut taamaallaat piffissani atuuffissani marlunni qinigaqqissinnaanerata pillugu allannguutissatut siunnersuummi aalajangersagaq

siunnersuutineqartoq. Pingaartumik Nunaoil A/S-imut aalajangersagaq taamaattoq naleqqutinngitsorujussuusussaavoq. Ikummatissiassaqaarfinnik qalluiffigineqarsinnaasunik ujarlernermit piffissap atorneqartartup sivisuumik sivisussuseqartarnera pissutigalugu Nunaoil A/S sivisoorujussuarmik piffissalersuilluni sulisarpoq. Taamaattumik siulersuisut piginnaanerit misilittakkallu pigisaat atatiinnarsinnaajumallugit, siulersuisunik sivisuumik allannguuteqanngitsumik ingerlaannartitsisinnaanissaq annertuumik pingaaruteqarpoq.

Aammattaaq Inuussutissarsiornermut Ataatsimiititaliap allannguutissatut siunnersuutaani ingerlatseqatigiiffiup suliaqarneranut tunngatillugu ukiumoortumik nassuiaatip imarisassaannut piumasaqaatit immikkuullarissut pillugit aalajangersagaq Naalakkersuisut inassutigisinnaanngilaat. Pingaartumik Siulersuisuni ilaasortat avataaniit nalilersuiffigineqartarnissaannik immikkut piumasaqaateqarnissaq naleqqutinngitsutut isumaqarfigineqarpoq.

Siulersuisut naleqquttumik piginnaaneqassasut Naalakkersuisut ataatsimiititaliaq isumaqatigaat, kisianni avataaniit pinngitsoorani nalilersuisarnissaq siunnersuutigineqartoq atuutilissagaluarpat, ilaatigut inuit naleqquttut siulersuisunut ilaasortassatut toqqarneqartarnissaannik ataatsimeersuarnermi akisussaaffeqarneq ersikkunnaarsinneqartussaavoq ilaatigullu inuit naleqquttumik piginnaaneqartut soqutiginnilersinnissaat ajornakusoortorujussuannortussaalluni.

Tassani siulersuisut annikitsuinnarmik akissaateqartinneqartussaanagerat ilanngullugu isiginiarneqassaaq, taamaattumik uuliasiornermi suliaasaqarfiup iluani inuit suliaminnut pikkorilluinnartut misilittagartuut Nunaoil A/S-ip siulersuisuinut qinigassanngortikkusussinnaanerannut piumassuseqarneq soqutiginninnerlu apequtaasussaavoq. Kisianni Naalakkersuisut ataatsimiititaliaq isumaqatigilluinnarpaat, ingerlatseqatigiiffiup aqutsisui Kalaallit Nunaanni ingerlatseqatigiiffinnik aqutsilluarnissamik piumasaqaatinik naammassinnissinnaassasut.

Tamatuma saniatigut Naalakkersuisut isumaqanngillat aqutsisussanik atorfinitsitsinermit suleriaasissat inatsimmi aalajangersimasumut tunngasumi uani maleruagassiuunneqassasut. Aqutsisussanik atorfinitsitsinerini aktiaatileqatigiiffinnut inatsimmi maleruagassat malinneqartussaapput tamatumalu saniatigut siulersuisut ingerlatseqatigiiffinnik aqutsilluarnissaq pillugu inassuteqaatit eqqumaffigisariaqassavaat.

Taamaattumik Naalakkersuisut allannguutissatut siunnersuummik saqqummiussipput, tassani pingaarnerusutigut ataatsimiititaliap allannguutissatut siunnersuutaa aallaavigineqarluni, kisiannili immikkoortuni matumani taariikkanni iluarsisutitaqarluni.

Taamaattumik Naalakkersuisut inassutigaaq Naalakkersuisut allannguutissatut siunnersuutaat saqqummiunneqartoq akuerineqassasoq.